

NEAR News

Нэгэн Зүүн хойд Ази- Нэгэн хамтын нийгэмлэг NEAR | One Northeast Asia Region, One Community NEAR

2015 оны 1-2 сар 60 дахь дугаар

Vol. 60

NEAR Холбооны 10-р Бүгд хуралд оролцогчид



Тусгай нийтлэл

Шинэ оны мэндчилгээ

Энэ сарын мэдээ

NEAR Холбооны үйл ажиллагаа / Холбооны Хэрэг эрхлэх газрын мэдээ / Гишүүн байгууллагуудын мэдээ / 2 дахь удаагийн эссэ бичлэгийн уралдааны тэргүүн байрын бүтээлээс толилуулж байна.

Сэдэвт нийтлэл

NEAR Холбооны 10-р Бүгд хурал

Эргэн дурсахуй

NEAR Холбооны Хэрэг эрхлэх газрын арга хэмжээ



Зүүн хойд Азийн бүс нутгийн
засаг захиргаадын холбоо

The Association of Northeast Asia Regional Governments

NEAR News

NEAR News сэтгүүл нь гишүүн байгууллагуудын мэдээг дамжуулах, харилцан мэдээлэл солилцох албан ёсны хэвлэл юм. NEAR Холбооны гол үйл ажиллагаа, гишүүн орон нутгуудын мэдээ, төрөл бүрийн нийтлэл, зарлал зэргийг голчлон нийтэлдэг 2 сар тутмын хэвлэл бөгөөд гишүүн орон нутаг, холбогдох байгууллагуудад үнэгүй тараадаг. Мөн сэтгүүлийг онлайн хэлбэрээр Холбооны вэбсайтад тавьдаг.

NEAR News сэтгүүл гишүүн орон нутгийн нийтийн бүтээл бөгөөд Зүүн хойд Азийн бүсийг сонирхогч хэн бүхэнд нээлттэй.

Сэтгүүлд чанартай нийтлэл, шинэ санаа оноо тусгахыг хүсвэл бидэнд хандана уу.



Vol. 60





Зүүн хойд Азийн 6 улс(Монгол, Орос, Хятад, Япон, Өмнөд Солонгос, Хойд Солонгос)-ын 76 орон нутаг(71 гишүүн орон нутаг, 5 ажиглагч статустай орон нутаг)-аас бүрдэх Зүүн хойд Азийг төлөөлөх орон нутгийн гадаад харилцаа, хамтын ажиллагааны олон улсын байгууллага юм.

Тус Холбоо хамтын хөгжил цэцэглэлт гэсэн үндсэн үзэл санаан дор Холбооны үндсэн дүрмийг баталж, эдийн засаг, хүмүүнлэгийн харилцаа, худалдаа, боловсрол соёлын харилцаа, байгаль орчин, гамшгаас сэргийлэх, хилийн хамтын ажиллагаа, шинжлэх ухаан технологи, аялал жуулчлал, далай загасны аж үйлдвэр, эрдэс баялаг, зохицуулалт, хүүхэд эмэгтэйчүүд, эмчилгээ, газар тариалан зэрэг төрөл бүрийн салбарт өргөн харилцаа, хамтын ажиллагааны төслийг хэрэгжүүлж байна. Европын орон нутгийн хамтын ажиллагааны төлөөлөх байгууллага AER, уур амьсгалын өөрчлөлтийн R20 зэрэг олон улсын байгууллагуудтай түншлэлийн харилцаа тогтоох, хамтын төсөл явуулах зэргээр идэвхтэй харилцан Зүүн хойд Ази төдийгүй дэлхийн хэмжээнд харилцаа, хамтын ажиллагааг явуулахад хичээн чармайж байна

NEAR Холбооны үүд хаалга үргэлж нээлттэй байна

Зүүн хойд Азийн бүсэд байршилтай, Холбооны үндсэн үзэл санаатай санал нэг орон нутгийн захиргаад тус Холбооны Бүгд хуралд оролцож, гишүүнээр элсэн орж болно.



Зүүн хойд Азийн бүс нутгийн засаг захиргаадын холбоо

The Association of Northeast Asia Regional Governments

Тусгай нийтлэл

Зүүн хойд Азийн бүсэд өөрчлөлт гарахыг найдах нь



Ким Жэ Хю
NEAR Холбооны Ерөнхий
нарийн бичгийн дарга

Зүүн хойд Азийн бүс төдийгүй дэлхий дахинд зөрчил мөргөлдөөн ихтэй байсан 2014 оныг ардаа орхиж, энхтайван, аюулгүй байдлын найдвар 2015 оны морин жилийг угтлаа.

2008 оноос хойш үргэлжилсэн дэлхийн эдийн засгийн хямрал өнгөрсөн жил Америк зэрэг орнуудад сэргэх хандлага ажиглагдсан ч Европын орнуудад болон Японы эдийн засаг хүндрэлтэй хэвээр байсан. Мөн Хятад, Оросын эдийн засгийн өсөлтийн хувь урьдахаас давсангүй. Америк бодлогын хүүгээ бууруулах байдлаа зогсоосон ч Европ, Япон шил дараалан бодлогын хүүгийн бууруулалтыг өргөтгөх нь зохиомол валютын өрсөлдөөнийг үүсгэн дэлхийн эдийн засагт сөргөөр нөлөөлөх болж байна.

Мөн өнгөрсөн жил улс төр, аюулгүй байдлын хувьд Зүүн Европын Украин, Ойрхи Дорнодын Исламын улсуудын хурцадмал байдал дээд цэгтээ хүрсэн бөгөөд энэ жил ч тогтворгүй байдал үргэлжлэх шинжтэй байна. Баруун Африкийн бүсэд гарсан эболагийн аюул бид бүгдийг заналхийлж байна.

Авууштай нь 1992 оноос үргэлжилсэн уур амьсгалын өөрчлөлтийн асуудлыг дэлхийн хэмжээнд шийдвэрлэж чадаагүй байсан ч 2014 оны сүүлээр Перу улсын Римад болсон COP20 хурлын дараагаар энэ жилийн 12 сард Францын Парист зохиогдох НҮБ-ын Уур амьсгалын өөрчлөлтийн дээд хэмжээний хурал(COP 21)-аар Америк, Хятад зэрэг улс хооронд тохиролцоонд хүрч уур амьсгалын өөрчлөлтийн талаарх тодорхой зорилт, үйл ажиллагааны төлөвлөгөөг гаргана гэдэгт найдаж байна. Уур амьсгалын өөрчлөлт байгалийн энгийн үзэгдлээс үүдэлтэй аюулын хүчин зүйлээс хальж, геополитикийн хэмжээнд хүрч байгаа бөгөөд үүнийг шийдэж чадахгүй бол бүсийн маргалдаан зэрэг аюулгүй байдал хүртэл газар авах хэмжээнд хүрээд байна.

Зүүн хойд Азид ч өнгөрсөн жил газар нутгийн маргалдаан, түүхийг гуйвуулах асуудлаас үүдэн зөрчил сөргөлдөөн гүнзгийрсэн ч энэ жил Хятад, Солонгос, Япон зэрэг орнуудад өөрчлөлт гарч, улс хоорондын эвлэрэл, орон нутаг хоорондын идэвхтэй харилцаа, хамтын ажиллагаа явагдана гэдэгт найдаж байна. Япон, Хятадын бодлогын хүүг бууруулахаас үүдэн валютын зохиомол өрсөлдөөн байгаа төдий ч чөлөөт худалдааны хэлэлцээр идэвхтэй хийгдэж буй бөгөөд удаан хугацаанд нааштай үр дүнтэй, нэн ялангуяа соёл, аялал жуулчлалын салбар идэвхжих шинжтэй байна.

Хүн төрөлхтний асуудал болох уур амьсгал, халдварт өвчин, ядуурал ба хүнс тэжээлийн хомсдол Зүүн хойд Азийг ч тойрохгүй бөгөөд үүний тулд ЗХАБНЗЗХ(NEAR)-ны бүх гишүүд идэвхтэй хандан нийтээр хичээх шаардлагатай байна. Холбооны салбар хороодын үйл ажиллагаанд нийтлэг зорилготой байх шаардлага нэмэгдэж байна. Юунаас ч илүүтэй орон нутгийн захиргаа идэвхтэй үйл ажиллагаа явуулах нь чухал байна.



**Сергей Владимирович
Ерошенко**

Иркутск мужийн захирагч
бөгөөд NEAR Холбооны
тэргүүлэгч

Эрхэм хүндэт NEAR Холбооны гишүүд нөхөд өө!

Түүнчлэн NEAR NEWS сэтгүүлийг уншигч түмэн!

Хуучин оноо үдэж шинэ оноо угтах энэ босгон дээрээс бид хийж бүтээсэн зүйлс, амжуулж чадаагүй ажил бүхнээ эргэн харж, хүрсэн ололт амжилтаа дүгнэн алдаа дутагдлаасаа сургамж авдаг билээ.

Өнгөрсөн 2014 онд манай Ангар орчмын нутаг чухал үйл явдлаар арвин байсны дунд олон улсын хэмжээний ач холбогдолтой томоохон арга хэмжээ цөөнгүй байлаа. Түүнчлэн Зүүн хойд Ази болон Ази-Номхон далайн орнуудын зүгээс Эрхүү мужид хөрөнгө оруулах сонирхол урьд өмнийн адил их байгаа нь ажиглагдаж байна.

2016 онд Эрхүү мужид ЗХАБНЗЗХ-ны 11 дүгээр Бүгд хурлыг зохион байгуулахаар төлөвлөж байгааг мөн онцлон тэмдэглэж хэлэх хэрэгтэй. Тус Холбооны гишүүн байснаар Зүүн хойд Азийн орнуудтай худалдаа-эдийн засаг, хүмүүнлэгийн салбарт хамтын ажиллагааг идэвхитэй хөгжүүлэх боломжийг та бидэнд олгодог билээ.

Найрсаг зочломтгой Эрхүү нутаг нь энэ төрлийн олон улсын арга хэмжээг зохион байгуулж ирсэн арвин туршлагатайн хувьд Холбооны 11 дүгээр Бүгд хурлыг явуулахад тохирсон газар байх болно. Энэхүү арга хэмжээг дээд хэмжээнд бэлтгэж зохион байгуулахын тулд бид өөрсдийн зүгээс шаардагдах хүчин чармайлтыг гарган хичээж ажиллах болно.

Ингээд 2015 онд Таны болон гэр бүлийн тань санасан үйлс нь сэтгэлчлэн бүтэж, хөгжин цэцэглэж, эрүүл энх, аз жаргалтай, сайн сайхан бүхнээр дүүрэн байхыг ерөөе!



А.Эрдэнбаатар
Хөвсгөл аймгийн Засаг
дарга

Зүүн Хойд Азийн бүс нутгийн Засаг захиргааны холбооны гишүүн орон нутгууд болон Холбооны Хэрэг эрхлэх газрын хамт олон та бүхэнд Монгол улсын Хөвсгөл аймгийн ард иргэдийн нэрийн өмнөөс ирж буй шинэ оны халуун мэндийг өргөн дэвшүүлье.

Манай Хөвсгөл аймаг нь Монгол улсын хамгийн хойд хэсэгт, ОХУ-тай хиллэн оршдог, хүн амын тоогоороо улсын нийслэл Улаанбаатар хотын дараа ордог томоохон аймаг юм. “Монголын хөх сувд” гэгдэх үзэсгэлэнт Хөвсгөл нуурын нэрээр нэрлэгдсэн бөгөөд олон ястны баялаг өв соёл, бөө мөргөлийн уламжлал, эртний түүхийн дурсгалууд бүхий, байгалийн үзэсгэлэн цогцолсон Монгол улсын аялал жуулчлалын гол бүс нутаг.

Бид нэгэн тивд, газар нутаг ойр оршдогийн хувьд Зүүн хойд Азийн бүсийн улс орнуудтай гадаад харилцаа, хамтын ажиллагаагаа хөгжүүлэхийг зорьж, хөрш Орос улсын Буриад, Тувагийн БНУлс, Солонгос улсын Тэжон хотын Сү дүүрэгтэй ах дүүгийн барилдлага тогтоон, арга туршлага, амжилт ололтоо харилцан солилцож, суралцаж ирсэн билээ. Өнгөрөгч 2014 онд мөн Япон улсын Нийгата мужтай шинээр хамтын ажиллагаа тогтоож, Хөвсгөл аймгийн төрийн албан хаагч Холбооны хэрэг эрхлэх газарт төлөөлөгчөөр ажилласан зэрэг аймгийн гадаад харилцааны салбарт амжилт, ололттой жил болж өнгөрлөө.

NEAR холбоо нь бүс нутгийн орон нутгуудын энэ мэт нөхөрлөл, харилцан ойлголцол, хамтын ажиллагааг бэхжүүлэн хөгжүүлэх гүүр болж, олон ажил, арга хэмжээг санаачлан тогтмол зохион байгуулж ирсэнд бид талархалтай байдагаа илэрхийлье.

Цаашид Холбооны үйл ажиллагаа улам бүр өргөжин Зүүн Хойд Азийн бүс нутгаараа хамтдаа хөгжих гэсэн зорилгодоо гишүүн байгууллагуудын идэвхитэй оролцоо, дэмжлэгтэйгээр хүрч чадна гэдэгт итгэлтэй байна.

Ингээд айлчлан ирж буй 2015 онд NEAR холбоо болон гишүүн орон нутаг бүр хөгжил цэцэглэлт, амжилт бүтээлээр арвин байх болтугай хэмээн ерөөж, та бүхэнд эрүүл энх, аз жаргал, сайн сайхан бүхнийг хүсье.



Ким Гуан Юн
БНСУ-ын Кёнсанбүг мужийн
захирагч

ЗХАБНЗЗХ-ны нийт гишүүдэд шинэ оны мэндийг хүргэе.

Миний бие өнгөрсөн 7 сарын 1-ний өдөр иргэдийн 6 дахь удаагийн сонгуулиар мужийн захирагчаар дахин сонгогдсон билээ.

2015 онд шинэ стратеги, зорилт дэвшүүлэн Кёнсанбүг мужийг олон улсад улам таниулахын зэрэгцээ Холбооны гишүүн орнуудтай идэвхтэй харилцааг явуулах болно.

Өнгөрсөн 8 сард Алс Дорнодын улс төр, эдийн засаг, цэрэг армийн төв болох Хабаровск хотод NEAR Олон улсын форум зохиосон нь Хойд туйлын харилцааг идэвхжүүлэхэд их ач холбогдолтой байсан бөгөөд Кёнсанбүг мужаас Хабаровск хязгаартай нөхөрлөлийн харилцаа тогтоох санамж бичиг байгуулснаар аялал жуулчлал, эрүүл мэнд, худалдаа зэрэг төрөл бүрийн салбарт өргөн харилцаа нээгдэх болсон. Түүнчлэн 10 сард Жолланам мужид болсон Бүгд хурлаар БНХАУ-ын Жилинь муж, ОХУ-ын Хакасын БНУ Холбоонд гишүүнээр элсснээр нийт гишүүн орон нутгийн тоо 73-д хүрсэн.

NEAR Холбоо гишүүн орон нутаг хоорондын харилцаа хамтын ажиллагаа, ах дүүгийн харилцааг орон нутгуудын үйл ажиллагааг идэвхжүүлэх, олон улсын арга хэмжээнд оролцуулах, арга хэмжээний зарыг хүргэх зэргээр бодит үр өгөөж өгөхөд үүрэг гүйцэтгэдэг. Холбооны гишүүн 73 орон нутаг хоорондын харилцаа, орон нутгийн дипломат харилцааг улам идэвхжүүлэхэд та бүхний дэмжлэг чухал юм.

Кёнсанбүг муж одоогийн Солонгосын Засгийн газраас баримталж буй бүтээлч эдийн засаг соёл хосолсон Солонгос-Торгоны замын төсөл, Кёнжү-Дэлхийн соёлын экспо, Шинэ тосгон хөдөлгөөнийг дэлхийн таниулах зэрэг үйл ажиллагаагаар олон улсын харилцаа, бүтээлч эдийн засгийг хослуулан хөгжүүлэхийн тулд хичээж байна.

Мөн ирж буй 2015 онд дэлхий нийтийн анхаарлыг татах “Дэлхийн усны форум”, “Торгоны зам дагасан соёлын их наадам”, “Дэлхийн цэргийн спортын тэмцээн” зэргийг Кёнсанбүг мужийн хот болон Дэгү хотноо зохион явуулна.

Олон улсын арга хэмжээг амжилттай зохиоход гишүүн орон нутгуудын зүгээс идэвхтэй дэмжиж туслахыг хүсээд та бүхний ажил үйлс өөдрөг, аз жаргалаар дүүрэн, эрүүл энхийг байхыг хүсэн ерөөе.

Шинэ оны мэнд хүргэе.



Пуу Хүй
БНХАУ-ын Ниншя Хуйн
ӨЗО-ны дарга

Морин жилийг бид ардаа орхиж хонь жилтэй золголоо. Шинэ он аливаа сайн сайхны эхлэлийг илэрхийлдэг. Миний бие Ниншя Хуйн ӨЗО-ы Ардын засаг ба 6.540.000 иргэдийг төлөөлөн NEAR Холбооны гишүүдэд шинэ оны мэндийг хүргэе.

NEAR Холбоо байгуулагдснаас хойш гишүүн орон нутгууд хоорондын хамтын ажиллагаа, нээлттэй өрсөлдөөн зэрэгт тулгуурласан харилцааг тасралтгүй явуулж, эдийн засаг, худалдаа, соёл, аялал жуулчлал, газар тариалан, шинжлэх ухаан технологи зэрэг салбарт хамтран ажиллаж арвин амжилтад хүрсэн билээ. Тус Холбоо орон нутгийн захиргаадын хооронд гүүрийн үүрэг гүйцэтгэж байна.

Ниншя Хуйн ӨЗО нь Хятадын баруун хэсэгт орших ба эрчим хүч, газар тариалан, аялал жуулчлал зэрэг салбар хөгжсөн. Улсын дотоодын нефть хий хоолой дамжин өнгөрдөг Ниншя нь эртний торгоны замын гол зангилаа байсан. Одоо Хятадад орон нутгийн захиргаадаас цор ганцаар эх газрын нээлттэй эдийн засгийн жишиг бүс болсон бөгөөд ингэснээр гарах үр өгөөж нь их юм. Холбооны гишүүн 73 орон нутгийн нэг болохын хувьд гишүүний хариуцлагаа бүрэн ухамсарлаж, Холбооноос зохион байгуулдаг төрөл бүрийн арга хэмжээнд идэвхтэй оролцож, гишүүн орон нутгуудтай ч мөн харилцаатай байна. 2012 онд Холбооны 9-р Бүгд хурлыг амжилттай зохион байгуулсан. Хятад улсын төрийн тэргүүн Си Зын Пин “Торгоны замын эдийн засгийн бүс” байгуулах болон “21-р зууны далайн торгоны зам” стратегийн төлөвлөгөөг сэдсэн нь Зүүн хойд Азиас авахуулаад холбогдох орнуудын өргөн дэмжлэгийг авсан. Одоо Ниншя Хуйн ӨЗО улсын стратегийн бодлогын хүрээнд шинэ торгоны замын гол гарц болохын тулд дээд зэргээр хүчин чармайж байна. Мөн 2015 онд Инчүан хотноо Хятад-Арабын үзэсгэлэн зохиогдоно. Энэхүү арга хэмжээнд та бүхнийг өргөнөөр оролцохыг урьж байна. Бид Холбооны гишүүн орнуудтай эрчим хүч хэмнэх, байгаль орчин хамгаалах, соёл аялал жуулчлал, уур амьсгалын өөрчлөлт, цөлжилтөөс сэргийлэх зэрэг салбарт хамтын ажиллагааг бэхжүүлэхийг хүсч байна. Зүүн хойд Азид улам өргөн цар хүрээтэй гүн агуулгатай дээд түвшний харилцааг явуулж, бүсийг хөгжүүлэхийн тулд хичээж, Зүүн хойд Азийн бүсийн эв нэгдэл хамтын ажиллагаа, хөгжил цэцэглэлтийг бий болгоё. Төгсгөлд нь та бүхэнд эрүүл энх аз жаргалыг хүсэн ерөөе. Санасан бүхэн тань сэтгэлчлэн бүтэх болтугай.



Хирай Шинжи
Тоттори мужийн захирагч

Орон нутгийн харилцааг нэмэгдүүлэх, хамтын хөгжил түүнчлэн дэлхийн энхтайванд хувь нэмэр оруулах зорилгоор байгуулагдсан ЗХАБНЗХХ хүнээр яривал удахгүй 20 настайгаа золгох гэж байна.

Зүүн хойд Азийн эдийн засаг хурдацтай хөгжихийн хирээр бүсийн цаашдын хөгжилд найдвар төрөхийн зэрэгцээ 2018 онд БНСУ-д зохиогдох Пёнчан-Өвлийн Олимп, 2020 онд Токиод зохиогдох Токиогийн Олимп болон Паралимп дэлхийн хэмжээнд анхаарал татаж байна.

Тоттори муж Зүүн хойд Азийн бүсийн орон нутгуудтай харилцах нь бүсийн хөгжилд их хувь нэмэр болно гэж үзэж төрөл бүрийн салбарт идэвхтэй харилцааг явуулж байна. Тэдгээрээс БНСУ-ын Канвон муж, БНХАУ-ын Жилинь муж, ОХУ-ын Приморийн хязгаар түүнчлэн Монгол улсын Төв аймагтай хамтран жил бүр орон нутгийн захирагч нарын уулзалт зохиож ирсэн. Орон нутгуудын хамтын хөгжлийн талаар хэлэлцдэг Зүүн хойд Азийн бүсийн харилцаа, хамтын ажиллагаат орон нутгийн захиргааны дээд хэмжээний уулзалтыг 1994 оноос дээрх орон нутгуудад ээлжлэн зохиож байна. 2014 онд харилцааны 20 жилийн ойг угтан Бээжин хотноо зохиогдсон Хятад-Японы мужийн захирагч нарын форумд Тоттори мужийн захирагчийн хувьд биечлэн оролцсон билээ.

Түүнчлэн Тоттори муж далайд гарцтай орнуудтай ойр дөт оршдогын хувьд давуу талаа ашиглан Зүүн хойд Азийн бүсийг Японтой холбох сүлжээг бүрдүүлэхийн тулд зам тээврийн дэд бүтцийг сайжруулж байна.

Нэн ялангуяа Тоттори муж БНСУ-ын Ганвон муж, ОХУ-ын Приморийн хязгаартай хамтын ажиллагаатай ба Япон, Өмнөд Солонгосыг дайрч Орос руу хүрэх аялагчийн усан онгоцыг явуулж буй бөгөөд 5 жилийн турш зогсолтгүй хүн эд барааг тээвэрлэж ирсэн.

2014 оны 8 сард НҮБ-ын Хөгжлийн хөтөлбөр(UNDP)-ийн нэг болох Түмэн голын бүсийг хөгжүүлэх төлөвлөгөө(GTI)-ний хүрээнд Зүүн хойд Азийн бүсийн орон нутгийн захиргааны хамтын ажиллагааны хорооны хурлыг Тоттори мужид зохиосон ба эх газар, далайг хослуулсан тээвэрлэлттэй холбогдох ложистикийн асуудлыг шийдвэрлэхийн тулд ложистикийн хороог байгуулах санал гаргасан.

Тоттори мужд 2 нисэх онгоцны буудал байдаг. Юнаго Китаро онгоцны буудал нь олон улсын нисэх онгоцны буудал бөгөөд БНСУ-ын Инчон, Япон улсын Ханэда хотуудын хооронд шууд нийслэг хийдэг. Зүүн хойд Азийн бүстэй харилцахад зам тээврийн дэд бүтэц чухал юм. 2014 онд Японы Окинава, Кобэ, Ибараки зэрэг дотоодын хотуудад маршрутаа өргөтгөсөн ба Японы баруун бүсийн гол нисэх онгоцны буудал болохын хувьд үйлчлүүлэгчдэд хүрсэн, тохь тухтай үйлчилгээг үзүүлэхэд анхаарч ирсэн. Тоттори муж үзэсгэлэнт Тоттори элсэн манханаар алдартай бөгөөд дэлхийд нэртэй Конаны адал явдал комиксийн зохиогч Авуяама, Хүн мангас Таюумагийн зохиогч Гэгэну Китарогийн төрсөн нутаг билээ. Тиймээс ч ирэх хавраас Тотторигийн нисэх онгоцны буудлыг “Тотторигийн элсэн манхан, Конан нисэх онгоцны буудал” хэмээн нэрлэх болно. Мөн тус мужид Таюума ба Конан комиксийн сэдэвт тосгон байдаг. Түүгээр ч зогсохгүй дэлхийн геопаркаас хүлээн зөвшөөрсөн Санин далайн эрэг, халуун рашааны 10 газар, тэрчлэн Японы баруун бүсийн хамгийн том цанын бааз байрладаг Дайсэн уул зэрэг байгалийн үзэсгэлэнт газруудтай. Мөн одоо Мацба хавчны улирал бөгөөд жилийн 4 улирал тэгш үргэлжилдэг, идээ ундаа элбэг дэлбэг нутаг юм. Сүүлийн жилүүдэд триатлон, явган алхалт, дугуй зэрэг спорт аялалыг хөгжүүлж байна. Байгалийн спортоор дамжуулан байгальтай ойр ‘Japan Eco Track’ 1-р маршрутаар Тоттори мужийн баруун нутаг шалгарсан. Мөн энэ оны эхээр БНСУ-ын Жэжү мужид болох ‘World Trails Conference’ хурлаар дараагийн хурлыг Тоттори мужид зохиох эсэх нь шийдэгдэнэ. Түүнээс гадна энэ жил ‘Asia Trails Conference’ хурал Жэжү мужид зохиогдох ба Өмнөд Солонгос, Хятад зэрэг Зүүн хойд Азийн бүсийн төлөөлөгчид өргөнөөр оролцох юм.

Та бүхнийг Тоттори мужид урихын ялдамд эрүүл мэнд, аз жаргалыг хүсэн ерөөе.

NEAR Холбооны үйл ажиллагаа

“Миний мэдэх Зүүн хойд Ази” 2 дахь удаагийн эссэ бичлэгийн уралдааны дүн гарлаа.

NEAR Холбооны Хэрэг эрхлэх газраас гишүүн орон нутгуудын 14-18-насны хүүхэд, сурагчдын дунд 2 дахь удаагийн эссэ бичлэгийн уралдааныг зарласан билээ. Зүүн хойд Азитай холбогдох сэдвээр явуулсан энэхүү уралдаанд 5 улсаас нийт 46 хүүхэд оролцов. Уралдааны тэргүүн байрын эзнээр БНСУ-ын Кёнсанбүг мужийн Пухан хотын эмэгтэйчүүдийн ахлах сургуулийн 1-р ангийн сурагч Хо Сон Ён тодорлоо. Дэд байруудад БНСУ-аас Пак Сү Вуан, БНХАУ-аас Жан Ви Эн, Монгол улсаас С.Батцэцэг, ОХУ-аас Сиза Александра тус тус шалгарав. Сэтгүүлийн энэ удаагийн дугаарт тэргүүн байрын эссэ бичлэгийг нийтлэсэн ба дараа сарын дугаарт дэд байрын эссэ бичлэгийг нийтлэх болно.



NEAR Холбооны Хэрэг эрхлэх газрын төлөөлөгчид Хятад улсад айлчлав.



Ляонин мужийн Гадаад харилцааны хэлтсийн ажилтнуудын хамт



Ниншя Хуйн ӨЗО-ы Гадаад харилцааны хэлтсийн дарга Жан Хуай Ли(зүүн гар талаас), Холбооны Хэрэг эрхлэх газрын дарга Ли Жун Хуан(баруун гар талаас)

Холбооны Хэрэг эрхлэх газрын орлогч дарга Ли Жун Хуан тэргүүтэй төлөөлөгчид Холбоонд гишүүн элсүүлэх, орон нутгуудын харилцаа, хамтын ажиллагааг нэмэгдүүлэх зорилгоор 11 сарын 24-28-ны өдрүүдэд БНХАУ-ын Ляонин муж, Ниншя Хуйн ӨЗО-д тус тус айлчлав.

24-ний өдөр Ляонин мужийн гадаад харилцааны хэлтсийн орлогч даргатай уулзан Холбооны талаар танилцуулж, тус мужийг гишүүнээр элсэхийг санал болгов. Одоогийн байдлаар Ляонин муж Холбооны үйл ажиллагаанд ажиглагч статустайгаар оролцдог ч цаашид тус мужийн зүгээс Холбооны хүрээнд өргөн харилцаа явуулахыг хичээх болно гэв. Дараагаар нь 2012 онд Холбооны 9-р Бүгд хурлыг амжилттай зохион явуулсан Ниншя Хуйн ӨЗО-д айлчлан гадаад харилцааны хэлтсийн Азийг хариуцсан тасгийн дарга Жан Хуай зэрэг удирдах албаны хүмүүстэй уулзан харилцаа, хамтын ажиллагааг өргөжүүлэх арга замын талаар санал бодол солилцов.

Холбооны Хэрэг эрхлэх газрын мэдээ

Олон улсын эрдэм шинжилгээний 7-р хурал боллоо.

11 сарын 6-ны өдөр Сөүл хотноо Хэвлэлийн төвд “Олон улсын хамтын ажиллагаагаар дамжуулан Солонгосын хойгийг нэгтгэх эдийн засгийн стратеги” сэдвээр олон улсын 7 дахь эрдэм шинжилгээний хурал болж өнгөрлөө.

Солонгосын Зүүн хойд Азийн хамтын нийгэмлэгийн судалгааны сангаас тус сан байгуулагдсны 7 жилийн ойд зориулан олон улсын эдийн засгийн хамтын ажиллагаагаар дамжуулан Хойд, Өмнөд Солонгосын эдийн засгийн үйл ажиллагааг явуулах талаар хэлэлцэж, Солонгосын хойгийг нэгтгэхэд бүтээлч, тогтвортой арга замыг олох зорилгоор уг хурлыг зохиожээ. Эрдэм шинжилгээний хурлыг нээж тус сангийн удирдах зөвлөлийн дарга Ли Сэн Рюл үг хэлж, дараагаар нь “Хамтдаа хөгжих хороо”-ны дарга Ан Чүн Ён нээлтийн илтгэл тавив. Хуралд “Олон улсын хамтын ажиллагаагаар дамжуулан Хойд Өмнөд Солонгосын эдийн засгийн хамтын нийгэмлэгийг байгуулах стратеги”, “Хойд Өмнөд Солонгосыг нэгтгэхийн төлөө Өмнөд Солонгос Америкийн цэргийн холбоо ба Хятад, Өмнөд Солонгосын аюулгүй байдлын хамтын ажиллагааны стратеги” гэсэн сэдвээр

илтгэлүүд тавигдаж, дараагаар нь хэлэлцүүлэг өрнүүлэв. Хурлын дараагаар Зүүн хойд Азийн энх тайвны үйл хэрэгт хувь нэмэр оруулсныг үнэлж, хүндэт профессор Вуада Харукид 7 дахь удаагийн Зүүн хойд Азийн олон улсын хамтын ажиллагааны шагнал гардуулав. Холбооны Ерөнхий нарийн бичгийн дарга Ким Жэ Хю уг эрдэм шинжилгээний хуралд оролцож, Зүүн хойд Азийн олон улсын хамтын ажиллагаа ба Солонгосын хойгийг энхтайвнаар нэгтгэх талаар өөрийн санал бодлоос хуваалцав.



Шиманэ мужийн захиргааны Соёл, олон улсын хэлтсийн дарга Холбооны Хэрэг эрхлэх газарт айлчлав.



11 сарын 10-ны өдөр Япон улсын Шиманэ мужийн захиргааны Соёл, олон улсын хэлтсийн дарга Вакасики Шинжи Холбооны Хэрэг эрхлэх газарт айлчилж, тус газрын үйл ажиллагаатай танилцахаас гадна Солонгос, Японы харилцаа, нэн ялангуяа Кёнсанбүг муж ба Шиманэ мужийн харилцааны талаар санал бодол солилцов.

Тэрээр 11 сарын 7-ны өдөр Пусан хот дахь Япон улсын Ерөнхий консулын газраас зохион явуулсан япон хэлний ярианы тэмцээнийг үзэж, Шиманэ мужийн захирагчийн нэрэмжит шагналыг олгохоор Солонгост айлчилсан юм.

Шиманэ муж NEAR Холбоо байгуулагдахын өмнө Зүүн хойд Азийн бүсийн орон нутгуудын анхдугаар хурлыг зохиож байснаас гадна Холбооны Боловсрол, соёлын хорооны зохицуулагчаар ажилладаг. Тус хорооноос Зүүн хойд Азийн бүсийн хүүхэд залуучуудад зориулсан олон улсын харилцааны хөтөлбөрийг зохион явуулж байна.

Холбооны Ерөнхий нарийн бичгийн дарга Зүүн хойд Азийн шинэ дипломат харилцаа ба Солонгосын дипломат харилцааны бодлогын семинарт оролцлоо.



11 сарын 12-ны өдөр БНСУ-ын Сөүл хотноо Үндэсний ассемблейн номын сангийн их танхимд “Зүүн хойд Азийн шинэ дипломат харилцаа ба Солонгосын дипломат харилцааны бодлого” сэдэвт семинар болж өнгөрлөө. Уг семинарт Өмнөд Солонгосын төрөл бүрийн салбарын 250 гаруй хүн оролцжээ. Солонгосын Үндэсний

ассемблейн гишүүн Шим Юн Жу семинарыг хөтөлж, Солонгосын дипломат харилцааны институтын багш Жу Ян Хён, Сэжун судалгааны институтын доктор Ли Тэ Хуан, 21-р зуун цэрэг армийн судалгааны институтын захирал Ким Жин Уг нар “Зүүн хойд Азийн шинэ дипломат харилцаа ба Өмнөд Солонгосын дипломат харилцааны бодлого”-ын талаар хэлэлцүүлэг өрнүүлэв.

Холбооны Ерөнхий нарийн бичгийн дарга Ким Жэ Хю уг семинарт оролцож Зүүн хойд Азид NEAR Холбоо ямар үүрэгтэй талаар танилцуулга хийв.

Энэхүү семинарыг БНСУ-ын Гадаад харилцааны яам болон Батлах хамгаалах яамнаас ивээн тэтгэж, Дипломат харилцааны хүрээлэн, Сэжун судалгааны институт, Зүүн хойд Азийн хамтын нийгэмлэг судалгааны сангаас хамтран зохион байгуулжээ.

Холбооны Хэрэг эрхлэх газрын гадаад ажилчид Инчон хоттой танилцах аялалд оролцов.

11 сарын 28-ны өдөр Инчон хотын Олон улсын харилцааны сан, Инчон хотын хөгжил, аялал жуулчлалын газраас хамтран “Инчон хотын өнгөрсөн, одоо, ирээдүй 2014” аялалын хөтөлбөр зохион байгуулсан юм. Уг хөтөлбөрт БНСУ-д үйл ажиллагаа явуулж буй олон улсын байгууллагын төлөөлөл, холбогдох албаны хүмүүсийг урин оролцуулсан бөгөөд тэдгээр хүмүүст Инчон, Инчон орчмын Сунду хотыг сурталчлан, солонгос үндэсний соёл, уламжлалтай танилцах боломжийг олгосон.

Тус арга хэмжээ Инчон, Сунду хотуудын танилцуулгаар эхэлсэн бөгөөд дараагаар нь зочид 3G-Global tower буюу Олон улсын байгууллагуудын төвөөр айлчлахын зэрэгцээ, завиар аяласан. Мөн кимчи хэрхэн хийхийг сурч, Oakwood, Nest зэрэг Инчоны өвөрмөц онцлогтой, эдгээд содон шийдэлтэй зочид буудлуудаар явж танилцсан.

NEAR Холбооны Хэрэг эрхлэх газрын төлөөлөгчид уг хөтөлбөрт оролцохоос гадна Инчон хотын захиргааны холбогдох албаны хүмүүстэй уулзан санал бодол солилцсон. Энэхүү хөтөлбөрт оролцсоноор тус газрын гадаадаас ирсэн төрийн албан хаагчид солонгос үндэсний соёл уламжлалтай танилцаж, өргөн ойлголттой болж авсан. Түүнээс гадна хөтөлбөр эхлэхийн өмнөх өдөр Кёнги мужийн Сүвон хотоор явж Жусон улсын Жонжү их хааны үед баригдсан хааны ордон болон тухайн үед цэргийн сургуулилт байсан тулааны урлагийн үзүүлэх тоглолт үзэж сонирхов.



Гишүүн байгууллагуудын мэдээ

Хунан муж-БНХАУ

Чанша-Олон улсын баримал, сийлбэрийн урлагын наадам болов.

Хунан мужийн баримал, сийлбэрийн хүрээлэнгийн Лэй Шин захиралын санаачлагаар Чанша-Олон улсын баримал сийлбэрийн урлагийн наадам 9 сарын 16-30-ний өдрүүдэд амжилттай болж өнгөрөв. 2012 оны эхээр Лэй Шин захиралын бүтээл болох “Мартин Лютерийн Хаан баримал” Америкийн Вашингтон хотын улсын нэрэмжит талбайд тавигдаж байсан билээ. Түүнээс хойш Лэй Шин нэгэн зүйлийг мөрөөдөх болсон бөгөөд тэр нь Чанша хотноо олон улсын улсын баримал, сийлбэрийн наадмыг зохиож хотын баримал сийлбэрийн соёлыг хөгжүүлэх байлаа. Энэ удаагийн наадам “Хотын оюун санаа-Хотын соёл-Хотын бүтээлч байдал” сэдвээр болж үүнд 17 улсын 21 уран бүтээлч оролцож бүтээлүүдээсээ толилуулсан. Мөн сургуулийн сурагчдад урлагын сургалт явуулах зэрэг хөтөлбөр багтсан байна.

Жилинь муж-БНХАУ

Чанбайшан уулан дахь цасны наадам болон Олон улсын цас мөсний наадам болж өнгөрлөө.



Чанбайшан уул нь аялал жуулчлалын нөөцөт газар бөгөөд Хятадын цасны өлгий юм. “Чанбайшан уулан дахь цасны наадам” 2014 оны 11 сарын 1-ний өдрөөс 2015 оны 4 сарын 30-ны өдрийг хүртэл үргэлжилнэ. Цасны наадмын

хугацаанд Чанбайшан уулын аялал жуулчлалын бүсэд жуулчдыг өргөн хамруулсан өвлийн спортын арга хэмжээ болно. Түүнээс гадна олон улсын цасан баримлын уралдаан, галт уулын рашааны үйлчилгээ, амтат хоолны өдөрлөг, Хятад-Европын хотуудын захирагч нарын форум, Цасны соёл-Залуучуудын форум, цасан дахь гольфийн анхдугаар тэмцээн, Чанбайшан уулын олон улсын цас мөсний гэрэл зургийн үзэсгэлэн зэрэг арга хэмжээ болно.



Тояама муж-Япон улс

Тояамагийн булан “Дэлхийн хамгийн үзэсгэлэнт булан” клубт элсэнэ.

10 сарын 18-ны өдөр БНСУ-ын Жолланам мужийн Ёосу хотноо болсон дэлхийн хамгийн үзэсгэлэнт арлуудын клубын чуулга уулзалтад Тояама булан гишүүнээр элсэх болсон. Францад төвтэй дэлхийн үзэсгэлэнт арлуудын клуб нь дэлхийн өв санд бүртгэгдсэн Францын Мон Сен Мишель, Вьетнамын Халонг, Америкийн Сан Франциско зэрэг 24 орны 38 булангаас бүрдсэн, буланд түшиглэсэн аялал жуулчлалыг хөгжүүлэх зорилготой ТББ бөгөөд ЮНЕСКО-гоос дэмжлэг үзүүлдэг. Тояамагийн булан хавьд 3000 метрийн өндөртэй Датэяама уулын орой, байгалийн сонин үзэгдэл болох зэрэглээ, усанд автсан эртний ой, гэрэлт наймаалж зэрэг ховор амьтан ургамал байдаг. Мужийн иргэдийн оролцоотой “Ус мод ихтэй ойг бий болгох” зэрэг хөтөлбөр нь олон улсад өндөр үнэлэгдсэн. Одоо Тояама мужид Тояамагийн булангаар аялах маршрут, дугуйн зогсоол, кафе барих зэргээр тэнгисийн спорт, аялал жуулчлалыг хөгжүүлэх, олон улсын далайн аялагчдыг татах, далайн аялалын дэд бүтцийг өргөтгөх зэргээр дэлхийн үзэсгэлэнт арал болгохоор хүчин чармайж байна.



Далайн тэртээгээс харагдах Датэяама уулын оргил



Кайо Умару парк

Аомори муж-Япон улс

Аомори Ляонин хотууд хооронд нөхөрлөлийн харилцаа тогтоосны 20 жилийн ой боллоо.

10 сарын 28-ны өдөр Дайлэн хотноо Аомори хоттой нөхөрсөг харилцаа тогтоосны 10 жилийн ойд зориулсан арга хэмжээ болж өнгөрлөө.

2004 оны 12 сард хоёр хотын хооронд хамтын ажиллагааны санамж бичиг үйлдснээс хойш Аомори хотоос Дайлэн хотод бизнесийг дэмжих төв байгуулж, бизнесийн уулзалт зохиох, түүнчлэн хоёр хотын бага дунд сургуулийн сурагчид харилцан айлчлах хөтөлбөр зэргийг зохион явуулж ирсэн. Хамтын ажиллагааны ойн арга хэмжээнд хоёр хотын удирдлага, хувийн хэвшлийнхэн хамтарч зохиосон “Даалууны нөхөрсөг тэмцээн”-д 120 гаруй хүн оролцжээ. Түүнээс гадна бизнесийн, хүүхэд залуусын харилцааг улам идэвхжүүлж, аялал жуулчлал, газар тариалан, ой, далайн аж үйлдвэрийн салбарт тодорхой харилцааг явуулах талаар талууд хамтарч ажиллахаар болов.



Дайлэн хот болон Аомори хотын даалууны нийгэмлэгийн тэргүүлэгчдэд дурсгалын зүйл гардуулж буй нь (Баруун талаас Аомори хотын захирагч Шиканай, Аомори мужийн захирагчийн орлогч)

Гуанжү хот-БНСУ

Хятад, Солонгосын ахмадууд соёл, биеийн тамираар харилцана.

11 сарын 4-ний өдрөөс 5-ны өдрийг хүртэл Гуанжү хотноо “Хятад, Солонгосын ахмадуудын соёл, биеийн тамирын харилцааны арга хэмжээ болж өнгөрлөө.

Хятадын ахмадын төлөөлөгчид Гуанжү хотод айлчилж энэхүү арга хэмжээнд оролцжээ.

Эхний өдөр Вүхан хотын 63 ахмад, Гуанжү хотын 100 гаруй ахмад соёлын арга хэмжээнд оролцохоос гадна нөхөрсөг гэгтболын тэмцээн зохиов. 5-ны өдөр Гуанжү хотын үндэсний соёлын ордонд Хятадын Анхуй мужийн Шианчон хотын 90 ахмад, Гуанжү хотын Дунгү, Бүггү дүүргийн өндөр настны халамжийн байгууллагын 70 гаруй ахмад оролцсон тоглолт зохион байгуулсан. Энэ өдөр Хятадын ахмадууд дэвүүрт хийн дасгал, Гуанжү хотын ахмадууд спорт бүжиг, үндэсний дуу, бүжгийн тоглолтоос толилуулав. Хятадын ахмадын төлөөлөгчид арга хэмжээний дараа Гуанжү хотын музей, Жүнжанру гудамж зэргийг үзэж Гуанжү хоттой танилцав. Гуанжү хот 2009 оноос хойш Хэнан муж, Жилинь муж, Тяньжин хот зэрэг Хятадын 10 гаруй хот, мужийн 22000 гаруй ахмад, Гуанжү хотын 7000 гаруй ахмадыг уг хөтөлбөрт хамруулжээ. Энэ мэтээр Гуанжү хотын захиргаанаас Хятад, Солонгосын ахмадын соёлын харилцааг улам идэвхжүүлэхийн тулд төрөл бүрийн харилацааны хөтөлбөрийг боловсруулан гаргаж жуулчдыг татах талаар идэвхтэй үйл ажиллагаа явуулж байна.

Чүнчоннам муж-БНСУ

Барилга, олон нийтийн байгууламжийн дизайны наадам болж өнгөрлөө.



11 сарын 6-9-ний өдрүүдэд Чүнчоннам мужийн Сочон хотноо “Барилга, нийтийн байгууламжийн дизайны наадам 2014” болж өнгөрлөө. “Ой мод-Байгальтай шүтэлцэх барилга, нийтийн байгууламжийн дизайн” сэдэвт энэхүү соёлын наадам хүн-байгаль, барилга-байгаль, байгаль-дизайныг хүний амь амьдралтай уялдуулахыг зорьсон. Барилгын чиглэлээр Чүнчоннам мужийн барилга соёлын шилдэг бүтээлийн

үзэсгэлэнгийн хамтаар хүүхдийн цэцэрлэг зурж хийх, сэдэвт шилдэг бүтээлийн үзэсгэлэн гарсан ба нийтийн байгууламжийн дизайны чиглэлээр нийтийн байгууламжийн дизайны уралдааны шилдэг бүтээл, шилдэг нийтийн байгууламжийн дизайны магадлан итгэмжлэгдсэн бүтээгдэхүүний үзэсгэлэн гарав. Дээрх үзэсгэлэнгүүдэд Чүнчоннам мужийн барилгын компани, их дээд сургуулийн багш, олон улсын нийтийн дизайнерууд, Чүнчоннам мужийн боловсролын газар, Сочон хот зэрэг газруудаас бүтээлээ оролцуулсан бөгөөд Солонгосын үндэсний экологийн хүрээлэн, Бүмэ мауль тосгон, соёл урлагын бүтээлч газруудыг үзэх аялал зохиогдсон. Мөн Сочон хотын үндэсний далайн амьд биетийн нөөцийн институтэд нээлтийн ажиллагаа, уралдааны шагнал гардуулах ёслол болсон бөгөөд 7-ны өдөр Солонгосын үндэсний амьд биетийн нөөцийн институтэд ‘GREEN TOMORROW’ семинар зохиогдсон. 9-ний өдөр бага сургуулийн 4-6-р ангийн сурагчдад зориулсан “Бүтээлч Жу ахаас суралцах нь” хөтөлбөр зохиожээ.

Говь-Алтай аймаг-Монгол улс

9 дэх удаагийн “Их говийн тэмээний баяр” болж өнгөрлөө.

11 сарын 16-17-ны өдрүүдэд Говь-Алтай аймгийн Төгрөг сумд тэмээн сүргийн үүлдэр угсааг сайжруулах, тоо толгойг өсгөх, говийн малчид тэмээчдийн туршлагыг солилцуулах, тэдний хөдөлмөрийг үнэлэх алдаршуулахыг гол зорилгоо болгосноор ирсэн “Их говийн тэмээний баяр”, тэмээчдийн их наадам болж өнгөрлөө. 9 дэх удаагийн энэхүү баярын хүндэтгэлийн жагсаалд сум бүрээс ирсэн



тэмээчид жин тээх уламжлалыг үзүүлж, үндэсний хувцас хэрэглэл өмсөж тэмээгээ унан, тэмээний уламжлалт соёлыг харуулсан олон үзүүлбэр хэв маягийг наадамчдад үзүүллээ. Мөн тэмээний сүү цагаан идээний үзэсгэлэн худалдаа, тэмээний ноосон бүтээгдэхүүн эдлэл хэрэглэлийн үзэсгэлэн гарч иргэд ч таатай хүлээн авч худалдан борлуулалт сайтай байлаа. Их говийн тэмээний баярын үеэр тэмээчдийн зөвлөлгөөн болж УХАА-н газрын мэргэжилтнүүд, тэмээ судлаач эрдэмтэд оролцлоо. Энэхүү баяраар шилдэг буур, ингэ, сүүн болон ноосон бүтээгдэхүүн, тэмээний ганган хэрэглэл, тэмээ, тэмээчид, говь нутгийн тухай дуу, бүжиг, ерөөл магтаал шалгаруулсан урлагийн хөтөлбөр болж өнгөрлөө.

Алтайн хязгаар-ОХУ

Шанхайн хамтын ажиллагааны байгууллагын гишүүн орнуудын “Боловсролын долоо хоног” болон ШХАБ-ын орнуудын Боловсролын сайд нарын уулзалт болж өнгөрлөө.



Энэ оны 10 дугаар сарын 6-наас 10-ны өдрүүдэд Алтайн Их сургуульд Шанхайн хамтын ажиллагааны байгууллага /ШХАБ/-ын гишүүн орнуудын “Боловсролын долоо хоног”-ийн арга хэмжээ, 10 сарын 8-ны өдөр ШХАБ-ийн гишүүн орнуудын Боловсролын сайд нарын уулзалт тус тус болж өнгөрлөө. ШХАБ-ын түүхэнд анхны удаа зохион байгуулагдаж байгаа энэхүү долоо хоногийн арга хэмжээ нь Алтай хотод болсон бол 5 орны боловсролын салбарын дээд удирдлагуудын уулзалт нийслэлээс гадна орших дээд сургуульд явагдсан байна.

“ШХАБ-ын боловсролын долоо хоног” болон Боловсролын сайд нарын уулзалтад ОХУ-ын Боловсрол, шинжлэх ухааны сайдын орлогч, Казахстан улсын Боловсрол, шинжлэх ухааны дэд сайд, Кыргызстан улсын Боловсрол, шинжлэх ухааны сайд, Таджикстан улсын Боловсрол, шинжлэх ухааны сайд, ШХАБ-ын Ерөнхий нарийн бичгийн даргын орлогч, “ОХУ-ын хамтын ажиллагаа” байгууллагын орлогч дарга, ШХАБ-ын Их сургуулийн Ректоруудын зөвлөлийн дарга, түүнчлэн Орос улс, Төв Азийн орнуудын 25 их сургуулийн ректорууд оролцлоо.

Энэхүү арга хэмжээ нь үйл явдлаар дүүрэн байсан бөгөөд “Боловсролын долоо хоног”-ийн нээлтийн ёслолын ажиллагааны дараа нэгдсэн хуралдаан болж, ШХАБ-ын үйл ажиллагаанд ШХАБ-ын Их сургуулийн эзлэх байр суурь, оруулах хувь нэмрийн тухай асуудлыг хөндөж ярилцжээ.

“Боловсролын долоо хоног”-ийн эхний өдөр тус салбарын хамтын

ажиллагааны асуудлаар байгуулагдсан шинжээчдийн байнгын ажлын хэсгийн хуралдаан болсон бөгөөд энэ хуралдаанаар ШХАБ-ын орнуудын дээд боловсролын системийн интеграцчилалын асуудал, магистрын сургалтын онол, практикийн хэтийн чиглэлээрх инновацийн хөтөлбөрүүд, боловсролын хамтарсан төслүүдийн тухай гэх мэт өнөөгийн чухал асуудлуудыг хэлэлцсэн байна. Харин 10 дугаар сарын 8-ны өдөр ШХАБ-ын гишүүн орнуудын Боловсролын сайд нарын уулзалт болж, ШХАБ-ын Их сургуулийн гэрчилгээний хэлбэр загвар, журмыг баталсан нь уулзалтын гол үр дүн боллоо. Мөн ШХАБ-ын Их сургуулиуд болон улс орнуудын хамтын ажиллагааны “Дурсгалын гудамж”-нд мод суулгаж, шинэ хөшөөний нээлт хийх ёслол хүндэтгэлийн арга хэмжээ явагджээ.

Красноярск хязгаар-ОХУ

“Красноярскийн эдийн засгийн форум” нь Ази, Номхон далайн орнуудтай ОХУ-ын харилцаа, хамтын ажиллагааг хөгжүүлэх гол арга зам болно.



2015 оны 2 дугаар сарын 26-28-ны өдрүүдэд ОХУ-ын Красноярск хотод 12 дахь удаагийн “Красноярскийн эдийн засгийн форум” болох бөгөөд энэ нь Сочи болон Петербургийн форумын хамт Орос улсын гол 3 форумд тооцогддог юм.

Энэ удаагийн Красноярскийн форумын үндсэн сэдэв нь БРИКС болон Ази-Номхон далайн орнуудтай хамтын ажиллагааг хөгжүүлэх, импортыг орлуулах тухай асуудал байхын зэрэгцээ Евразийн эдийн засгийн холбооны нэгдлийн үйл явцыг өргөжүүлэх төлөвлөгөө (2015 оны 1 сараас, Орос, Беларусь, Казахстан), Орос улсын эдийн засгийн өрсөлдөх чадварыг сайжруулах тухай асуудлуудыг мөн форумын индэрт хэлэлцүүлэхээр төлөвлөж байна.

Түүнчлэн Красноярск мужид тулгарч буй асуудлууд, хөгжил, хүн амын амьдралын түвшинг дээшлүүлэх гэх мэт орон нутгийн чанартай асуудлууд ч мөн форумд оролцогч мэргэжилтэн, шинжээчдийн анхаарлын төвд байна.

Форумын хөтөлбөрийн хүрээнд хөдөө аж ахуйн салбар, хөрөнгө оруулалтыг дэмжих дэд бүтэц, зам тээвэр, харилцаа холбоо, IT-ийн салбарын хөгжил гэх мэт цаг үеийн асуудлуудаар дугуй ширээний ярилцлага явуулахаар төлөвлөж байна. Энэхүү форумын хэлэлцүүлэгт ОХУ-ын Засгийн газрын гишүүд, шинжээчдийн нийгэмлэгийн төлөөлөл оролцдог зэргээрээ Красноярскийн форум өөрийн гэсэн онцлогтой.

Форумын салбар хэлэлцүүлгүүд болон нэгдсэн хуралдааны үр дүнд бодит гэрээ хэлэлцээрүүд байгуулагдах юм.

Энэхүү арга хэмжээний тухай болон хэрхэн оролцох тухай мэдээллийг <http://krasnoforum.ru/> цахим хуудаснаас үзэж болно.

2 дахь удаагийн эссэ бичлэгийн уралдааны тэргүүн байрын бүтээлээс толилуулж байна.

Уралдааны тухай

NEAR Холбооны Хэрэг эрхлэх газраас гишүүн орон нутгуудын 14-18-ны насны сурагчдийн дунд Зүүн хойд Азийн сэдэвт 2 дахь удаагийн эссэ бичлэгийн уралдааныг зарласан билээ. Энэхүү уралдаанд Монгол улсаас 5, ОХУ-аас 22, БНСУ-аас 9, БНХАУ-аас 6, Япон улсаас 4 буюу нийт 46 сурагч оролцов. Тэргүүн байрт 1, дэд байрт улс бүрээс тус бүр 1 байр эзлүүлэв. Сэтгүүлийн энэ удаагийн дугаарт тэргүүн байрын эссэ бичлэгийг толилуулж байна.

Зүүн хойд Азийн улс төрийн байдал-Миний нүдээр



Хо Сон Ён
Пухан хотын
эмэгтэйчүүдийн ахлах
сургуулийн 1-р ангийн
сурагч

Сүүлийн үед дэлхийн эдийн засагт Зүүн хойд Азийн хүлээх үүрэг улам чухал болж байна. Дэлхийн эдийн засаг, аюулгүй байдал зэрэгт нөлөөтэй Америк, Хятад 2 улсыг илтгэх G2, мөн түүнчлэн Америкаас илүү нөлөөтэй улс гэсэн утга бүхий BIG1 гэж хэлэгдэх Хятад, өнөөг хүртэл Дорнын хөгжингүй улс гэгдэж нэр хүнд нь өндөр байсан Япон, хүн хүчний их нөөц, интернет технологи хөгжсөн Өмнөд Солонгос нь Зүүн хойд Азийн эдийн засгийн хөдөлгөгч юм.

Өмнөд Солонгос нь Хятад, Япон 2 улсыг холбогч тэнхлэг гэж боддог. Энэ 2 улсын дунд нь орших геополитикийн байршил, Хойд, Өмнөд Солонгос нэгдлээ гэж үзэхэд ирээдүйд энэ нь биеллээ олох Транс-Сибирийн төмөр зам, Транс-Хятадын төмөр замыг холбох нь Өмнөд Солонгос-Орос-Хятадын харилцаанд чухал үүрэгтэй. Өмнөд Солонгос ба Японы далайн гүний тунель барих төсөл нь 2 улсын гарцын үүрэг гүйцэтгэх юм. Өмнөд Солонгос-Орос-Хятадыг холбох дээрх 2 төмөр замын хувьд Өмнөд Солонгос эцсийн зогсоол болох төдийгүй Японтой далайн гүний тунелийг холбосноор 4 улс хооронд асар том тээврийн сүлжээг үүсгэх юм. Энэ нь Өмнөд Солонгос Зүүн хойд Азийг авч явах том улс хоорондын эдийн засгийн харилцаанд чухал үүрэгтэйг харуулж буй жишээ юм. Өнгөц харахад 4 улсыг холбох сүлжээ ч өргөн утгаар бол дэлхийн эдийн засгийн байдалд их нөлөө үзүүлэх ба Зүүн хойд Азийн бүсийн эв нэгдлийг харуулах юм.

Зүүн хойд Азийн эдгээр 3 улс эрх тэгш, харилцан ойлголцлыг чухалчлах хэрэгтэй. Хэрэв өөр хоорондоо үл ойлголцвол хагарал үүснэ. Эдгээр улсууд эв найртай байснаар Зүүн хойд Азийн энхтайван, хамтын ажиллагаа, тогтвортой байдлыг хангана.

Түүнчлэн хүүхэд залуучуудын үүрэг бас чухал юм. Ирээдүйн нийгмийг авч явах бид өөр улсын талаар ойлголттой байж анхааран сонирхдог байх нь чухал гэж бодож байна.

Үнэндээ Зүүн хойд Азийн хүүхэд залуучууд, тэр тусмаа би өөрөө энэ бүсийн талаар бодож үзсэн билүү? Одоо 17 настай би үргэлж Хятад, Солонгос, Японоор төлөөлүүлж Зүүн хойд Азийн талаар бахархан боддог байсан ч түүнээс цааших тодорхой зүйлийг бодож байсангүй. Хүний амьдралын хамгийн сайхан үе гэж болох ахлах сургуулийн 1-р ангид сурч буй би юу ч хийж чадна гэсэн хүсэл мөрөөдлөөр дүүрэн байна. Энэ сайхан хүүхэд насанд, Зүүн хойд Азийн миний үе тэнгийн охидууд ч ялгаагүй миний адилаар аз жаргалтай насан дээрээ байгаа гэж бодож байна. Дэлхийн 2-р дайны үед Японы армийн цэргүүдийн сексийн хэрэгцээнд хүчээр боолчлогдож байсан Солонгос эмэгтэйчүүдэд туслах хандивын аян болох бугуйвчийг манай ангийнхан худалдаж авахад жараад жилийн өмнө хүүхэд насандаа тэр эмэгтэйчүүд бидэн шиг аз жаргалтай байсан болов уу? Мөн тэр үед Хятад, Японы охидууд ямар байсан бол? гэж бодох болсон.

Зүүн хойд Азийн бүсийг бүхэлд нь авч үзэн ирээдүйг харахын тулд харилцан ойлголцолд суурилсан Зүүн хойд Азийн түүхэн өнгөрсөн асуудлыг шийдвэрлэх хэрэгтэй гэж бодож байна. Түүхийн талаар хэлэлцэж, соёлоор харилцах хөтөлбөр явуулбал зүйтэй. Өнгөрсөн үеийн Солонгос, Хятад охидын асгаруулсан нулимсыг Япон охидууд арчиж, сэтгэлийг нь тайтгаруулах хэрэгтэй.

Зүүн хойд Азийн ирээдүйн төлөө хамтдаа зүтгэцгээ. Өөрийн мөрөөдөлдөө хүрэхийн тулд хичээж, хөршийгөө ойлгон хүндлэх, түүнээс суралцахад Хойд Солонгос, Хятад, Японы миний насны үе тэнгийн охидын талаарх бодол тэлж, улс оронд болж буй асуудлыг өөрийн асуудал мэт хүлээн авч бодон тунгааж, асуудлыг шийдвэрлэхийг хичээх болно гэж бодож байна. Би Зүүн хойд Азийн бусад орны хүүхдүүдтэй уулзахыг хүсч байна. Азийн охидууд хэрхэн амьдардагыг мэдэж, тэдэнтэй харилцан ярилцахыг хүсч байна. Түүнчлэн хамтдаа аз жаргалтайгаар дуу дуулахыг хүснэм.

NEAR Холбооны 10-р Бүгд хурал

Ерөнхий тойм

Тус Холбооны 10-р Бүгд хурал 10 сарын 21-ний өдрөөс 24-ний өдрийг хүртэл “Зүүн хойд Азийн хамтын ажиллагааны шинэ үеийг бүтээх нь” сэдвээр БНСУ-ын Жолланам мужид болж өнгөрлөө. Энэ удаагийн Бүгд хуралд Монгол улсаас 6, ОХУ-аас 4, БНХАУ-аас 5, БНСУ-аас 12, Япон улсаас 4 орон нутаг, ажиглагч статустай орон нутаг болон холбогдох байгууллага зэргээс 120 гаруй хүн оролцлоо.

Бүгд хурлыг нээж Жолланам мужийн захирагч Ли Наг Ён баяр хүргэж үг хэлж, дараагаар нь Холбооны Ерөнхий нарийн бичгийн дарга Ким Жэ Хю, Жолланам мужийн ИТХ-ын дарга Мён Хён Гуан мэндчилгээ дэвшүүлэв. Хурлаар Холбооны үйл ажиллагааны тайлан, гишүүн орон нутгуудын төлөөлөгчдийн илтгэл, Бүгд хуралд оруулах санал, тайлан тавигдсан. Мөн түүнчлэн Холбооны Хэрэг эрхлэх газраас хуралд санал оруулж илтгэсэн ба хурлаар асуудлыг хэлэлцэж Жолланамын мэдэгдэлийг гаргасан.



NEAR Холбооны Ерөнхий нарийн бичгийн дарга Ким Жэ Хю хурлыг даргалав



Бүгд хурал зохиох Иркутск мужид Холбооны тугийг гардуулж буй нь

Холбооны гол үйл ажиллагааны тайлан

Эхлээд Жолланам мужид болсон Холбооны Ажлын хорооны 9-р хурлын тайланг тавьсан. Тайлан илтгэлд дараагийн Бүгд хурал зохиох газрыг шалгаруулах, Холбооны Үндсэн дүрэмд өөрчлөлт оруулах, Салбар хорооны нэрийг өөрчлөх болон шинээр хороо байгуулах асуудлыг хэлэлцсэн тухай дурдсан. Мөн Холбооны цаашдын үйл ажиллагааны тулд судалгааны байгууллагаар хийлгэсэн анализийн талаар танилцуулсан. Холбооны Хэрэг эрхлэх газрын үйл ажиллагааны тайланд гишүүн орон нутгуудын харилцааг идэвхжүүлэхэд дэмжлэг үзүүлж буй тухай мөн R20 байгууллагатай харилцааны санамж бичиг үйлдэх зэргээр олон улсын байгууллагуудтай хамтын ажиллагааг тогтоосон тухай дурдсан.

Холбооны харьяа салбар 8 хорооны үйл ажиллагааны тайланг тавьсан. Эхлээд Хятад улсын Шаньдун мужаас зохицуулагчаар ажиллуулдаг Далай загасны аж үйлдвэрийн хорооноос далайн шинэ аж үйлдвэр болон далайн технологийн парк байгуулах сэдвээр форум зохиосон тухай тайлагнасан. Япон улсын Тояма мужаас “Хил хязгааргүй байгаль” зэрэг 3 төсөл хэрэгжүүлсэн тухай, Гамшгаас сэргийлэх хорооны үйл ажиллагаатай холбогдуулан Хёго мужаас “Японы зүүн нутагт болсон хүчтэй газар хөдлөлтийн дараах сэргээх босгох үйл ажиллагаа” сэдэвт лекц, бусад орон нутгуудын туршлагын талаар илтгэл тавигдсан тухай, Боловсрол соёлын хорооноос Зүүн хойд Азийн харилцааны жигүүр Шиманэд арга хэмжээ зохиосон тухай тус тус илтгэсэн. Мөн Холбооны Био эмчилгээ, аж үйлдвэрийн хорооноос био аж үйлдвэрийн чиглэлийн харилцаа явуулсан тухай, газар тариалангийн хорооноос уур амьсгалын өөрчлөлттэй холбогдуулан газар тариалангийн бүтээгдэхүүнийг тогтвортойгоор үйлдвэрлэх арга замын талаар хурал зохиосон тухай, Эдийн засаг, хүмүүнлэгийн хорооноос Зүүн хойд Азийн бүсийн эдийн засаг, хүмүүнлэгийн харилцааны уулзалт сэдвээр хурал зохиосон тухай тус тус тайлагнасан. Эрдэс баялаг нөөц боловсруулалт, зохицуулалтын хорооноос гишүүн орон нутгуудын эдийн засгийг хөгжүүлэх стратеги болон уул уурхай, хөрөнгө оруулалтын компаниудийн нөөц баялагын талаар мэдээлэл хуваалцах, харилцан мэдээлэл солилцох талаар хэлэлцсэн.

Гишүүн орон нутгуудын илтгэл

БНХАУ-ын Хэнан мужаас Цонму сумд хэрэгжүүлсэн төсөл, Япон улсын Хёго мужаас Монгол улстай байгаль орчны хамтын ажиллагааг явуулсан тухай болон мужийн байгаль орчны технологийн талаар илтгэсэн. Шиманэ мужаас Холбооны салбар хорооны зохицуулагчийн хувьд цаашдын үүргийн талаар, Монгол улсын Архангай аймгаас “Аймгийн хөгжлийн бодлого”-ын талаар, Булган аймгаас “Аймгийн танилцуулга” Буриадын БНУ-аас улсын хөгжлийн төсөл, Сахагийн БНУ-аас спортийн үйл ажиллагаа болон “Азийн хүүхдүүд” хэмээх олон улсын тэмцээн, Кёсанбүг мужаас “Кёнжү-Дэлхийн соёлын экспо”-ны танилцуулга болон илтгэл тус тус тавьсан.

Бүгд хурлаар хэлэлцсэн зүйл

Холбооны 10-р Бүгд хурлаар БНХАУ-ын Жилинь муж, ОХУ-ын Хакассийн БНУ-ыг Холбоонд гишүүнээр элсүүлэх, Холбооны Үндсэн дүрэмд өөрчлөлт оруулах(Ажлын хорооны хурал зохиох хугацаа, Холбооны Хэрэг эрхлэх газрыг удаанд хугацаанд байршуулахтай холбоотой) асуудлыг хэлэлцсэн.

2016 онд Бүгд хурал зохиох хүсэлтийг ОХУ-ын Иркутск мужаас тавьсан бөгөөд үүнийг хуралд оролцогчид санал нэгтгэйгээр дэмжсэн.

NEAR Холбооны Хэрэг эрхлэх газраас дэвшүүлсэн санал

Энэ удаагийн Бүгд хуралд Холбооны Хэрэг эрхлэх газраас Холбооны гишүүний хураамж нэвтрүүлэх, салбар хороодын үйл ажиллагааг идэвхжүүлэх арга замын талаар санал тавив. Гишүүний хураамж нэвтрүүлэх тухайд 2015 оны Ажлын хорооны хуралд асуудлыг хэлэлцүүлэхээр болсон бөгөөд салбар хороодын үйл ажиллагааг идэвхжүүлэх утгайд гишүүн орон нутгуудын саналыг хүлээж авахаар болов.



1. NEAR Холбооны тэргүүлэгч, Жолланам мужийн захирагч Ли Наг Ён баяр хүргэж үг хэлж буй нь
2. Магадан мужийн төлөөлөгч илтгэл тавив 3. Хурлын үеэрх хэлэлцүүлэг
4. Жолланам мужийн Гуанян дахь Поско төмөрлөгийн үйлдвэр үзсэний дараа
5. Сүнчоны булан дахь Олон улсын цэцэрлэгийн үзэсгэлэнд

Жолланамын мэдэгдэл

2014 оны 10 дугаар сарын 21-ний өдрөөс 24-ний өдрийг хүртэл БНСУ-ын Жолланам мужийн Ённам сумд болсон ЗХАБНЗЗХ (NEAR)-ны 10-р Бүгд хуралд Монгол улс, ОХУ, БНСУ, БНХАУ, Япон улсаас Холбооны гишүүн болох 33 орон нутаг, ажиглагч болон гишүүн бус байгууллагын төлөөлөгчид оролцлоо.

Хурал “Зүүн хойд Азийн хамтын ажиллагааны шинэ үеийг бүтээх нь” сэдвээр болж, тус байгууллагын гишүүн орон нутгууд нь “21-р зуун-Азийн зуун” хэмээх цаг үед нийцүүлэн, Зүүн хойд Азийн бүс нутаг дахь зөрчил сөргөлдөөнийг арилгахын тулд бүс, орон нутаг хоорондын харилцаа, хамтын ажиллагаа аль ч цаг үеэс илүү ихээр шаардагдаж байгааг ухамсарлан, “Нэг Зүүн хойд Ази, Нэг хамтын нийгэмлэг” рүү тэмүүлэхэд хамтдаа хичээх талаар тохиролцлоо.

Мөн 1996 он тус Холбоо байгуулагдснаас хойш “Энх тайван-хамтын хөгжил” хэмээх Холбооны зарчим, “Аливаа улсын өрсөлдөх чадвар орон нутгуудаас хамаарна” гэсэн зорилтын дор эдийн засаг, байгаль орчин, соёл, гамшгаас сэргийлэх, шинжлэх ухаан технологи, биеийн тамир зэрэг 14 салбар хороодыг байгуулан бодит харилцаа, хамтын ажиллагааг явуулж зохих үр дүнд хүрсэн бөгөөд гишүүн орон нутгуудын идэвхтэй оролцоо, сонирхлоор дамжуулан Холбооны нэр хүндийг бэхжүүлэх талаар бүгд санал нэгдсэн.

Энэхүү хурлаар дэвшүүлсэн асуудлын талаар хэлэлцэж, дараах байдлаар шийдвэрлэв.

1. БНХАУ-ын Жилинь муж, ОХУ-ын Хакасын БНУ-ыг Холбоонд гишүүнээр элсүүлэхийг бүгд санал нэгтгэйгээр дэмжсэн.
2. 2016 онд ОХУ-ын Иркутск мужид Холбооны Бүгд хурлыг зохиохыг бүгд санал нэгтгэйгээр дэмжсэн.
3. Өмнөх Бүгд хурлаар “Ажлын хорооны хурлыг Бүгд хурал зохиогдохын өмнөх жил зохионо”, “Холбооны байнгын Хэрэг эрхлэх газрыг Гёнсанбүг мужид удаан хугацааны турш байршуулна” гэж шийдвэр гарсны дагуу Үндсэн дүрмийн холбогдох журамд өөрчлөлт оруулсан.
4. Холбоо үүсгэн байгуулагдсны 20 жилийн ой тохиох 2016 он гэхэд Холбооны гишүүний үндсэн хураамж нэвтрүүлэх саналыг хэлэлцсний эцэст гишүүний хураамжийг нэвтрүүлэх зорилго, зориулалтыг тодорхой болгон 2015 онд болох Ажлын хорооны 10-р хуралд асуудлыг өргөн дэвшүүлэхээр болсон.
5. Холбооны харьяа 14 салбар хорооны үйл ажиллагааг үр ашигтай болгох арга замын талаар хэлэлцэж, уг асуудлыг Ажлын хорооны 10-р хуралд өргөн дэвшүүлэх болсон.
6. Холбооны Хэрэг эрхлэх газраас хүүхэд залуучуудыг хамруулах дадлагын хөтөлбөр (PioNEAR), эссэ бичлэгийн уралдаан зэргийг явуулахаас гадна гишүүн орон нутгийн төлөөлөгчдөд зориулсан дууны уралдаан зохиох тухайд гишүүн орон нутгуудын саналыг авсны дараа зохиохоор болсон.

2014 оны 10 сарын 22-ны өдөр

БНСУ-ын Жолланам муж



Хурлын дараагаар

Эргэн дурсахуй



NEAR Холбооны Хэрэг эрхлэх газрын арга хэмжээ



▲ БНСУ-ын Жолланам мужид болсон Холбооны 10 Бүгд хурлын үеэр Жолланам мужийн захиргааны ажилтнууд

2014 онд NEAR Холбооны Хэрэг эрхлэх газраас олон төрлийн арга хэмжээ зохиосон билээ. Тухайлбал 5 сард Холбооны гишүүн орон нутгуудийн гадаад харилцааны мэргэжилтнүүдийн хурал, 8 сард NEAR Олон улсын форум, 10 сард NEAR Холбооны Бүгд хурал зохиосон. Түүнээс гадна Холбооны гишүүн орон нутгуудаас зохицуулагчаар ажиллуулдаг салбар хорооны арга хэмжээ болж өнгөрснийг гэрэл зургаар танилцуулж байна.



▼ БНСУ-ын Жолланам мужид болсон Холбооны 10 Бүгд хурлыг зохион байгуулагчид



◀ Гамшгаас сэргийлэх хорооны хуралд оролцогчид



▲ Жолланам мужид болсон Холбооны 10-р Бүгд хуралд оролцсон Монголын төлөөлөгчид



▲ NEAR Олон улсын форумд илтгэл тавьсан Сон Вон Юн багш, Хүлээн авалтын үеэр



▲ Холбооны Хэрэг газарт ажиллаж байсан Монгол, Японы төрийн албан хаагчид хурлаар дахин уулзалдсан нь



7

► Холбооны Ерөнхий нарийн бичгийн дарга Ким Жэ Хю Хятад үндэсний цайлах ёсноос сурч буй нь

The Association of Northeast Asia Regional Governments



Зүүн хойд Азийн бүс нутгийн засаг захиргаадын холбоо

The Association of Northeast Asia Regional Governments

Хаяг. Кёнсанбүг муж, Пухан хот, Намгү Жигүгну 394(Жигүгдун 601) Пухан Техно парк 3 давхарт

Утас. +82-54-223-2384 **Факс.** +82-54-223-2309 **E-mail** neargov@hotmail.co.kr **Website** www.neargov.org